

**Tidak ada muzakarah – Hadi
Utusan Online
22 Mei, 2012
Oleh KHAIRUL ABIDIN NUAR**

TAIPING 21 Mei - Presiden Pas, Datuk Seri Abdul Hadi Awang (gambar) memadam spekulasi akan wujudnya muzakarah antara UMNO dan Pas apabila menegaskan bahawa pertemuan itu tidak akan berlaku kerana menyifatkan ia hanya permainan politik UMNO menjelang pilihan raya umum.

Abdul Hadi berkata, Pas sudah mengajak dan memperkatakan mengenai muzakarah sejak berpuluh tahun lalu tetapi mendakwa UMNO tidak pernah bersetuju malah memberikan pelbagai alasan.

Beliau berkata, tidak timbul soal Pas tidak ikhlas untuk bermuzakarah, sebaliknya UMNO yang perlu ikhlas dalam memastikan Pilihan Raya Umum Ke-13 (PRU-13) dijalankan secara adil.

"Sebenarnya UMNO hanya bermain politik. UMNO mesti tunjukkan keikhlasannya untuk pastikan pilihan raya akan datang bersih daripada sebarang penipuan. Kalau pilihan raya tidak bersih, muzakarah pun tidak ada makna.

"Muzakarah yang dipohon oleh UMNO ini juga hanya hendak menutup isu tuntutan Bersih dan kelemahan UMNO, (maka) kita tidak akan bermuzakarah," katanya kepada pemberita selepas menghadiri ceramah di Taman Kota Wira, Ulu Sepetang, dekat sini malam tadi.

Abdul Hadi mendakwa, tindak-tanduk UMNO yang mahu mengadakan muzakarah dengan Pas menjelang pilihan raya umum akan datang bertujuan menunjukkan kepada orang Melayu bahawa mereka mahu berbaik-baik dengan Pas.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0522&pub=Utusan_Malaysia&sec=Politik&pg=po_07.htm